



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tir\_yimyim

tir yimyim TAPAK 7

**Haryana nung AAP mendenibo sorkar metentetsü**

**Election nung takok mongura Jewish voter tai asütsü: Trump**

VOL. XXI ISSUE NO. 339 (ADOK 339) DIMAPUR KÜPTOKNÜ (SATURDAY) RONGJUI (SEPTEMBER) 21, 2024 ₹ 5.00

## Nagaland nung küm 5 tsüngda "Zero Accidents, Zero Fatalities" alizüng atongtsü

**Kohima, September 20, 2024 (TYO):** Nagaland Motor Vehicles Department-i taruba küm pungu tsüngda "Vision Zero: Zero Accidents, Zero Fatalities" alizüng atongtsü.

"Nagaland Road Safety Authority atema Lead Agency ji Motor Vehicles Department lir aser taruba küm pungu tsüngda iba alizüng atongtsü" ta State Transport Secretary, Robert Longchari-i ashi.

Hokolbarnü Nagaland nung iRAD/e-DAR (Integrated Road Accident Database/Electronic Detailed Accident Report) training nung jembidang pai iba osang metetdaksü.

Iba training ya Nagaland Road Safety Authority kübok agir aser Motor Vehicles Department-i Ministry of Road Transport & Highways (MoRTH), Nagaland State Centre (NIC) aser NICS Central Team den yaritepa ayongzüker.

Gari lenmang ya nisung ka taküm nung tongtipang shilem ka lir aser road transport system ajanga nisung taküm aika samaba aser yiruba ajurua arur. Küm shia India nung gari lendong aika ataloker aser alima nung lendong atalokba 13% ji India nung atalokba asür, ta Robert Longchari-i ashi.

"Iba ajanga road safety tangatetba prokshitsü nüngdaker aser Nagaland nunga gari lendong teimba ataloka aruba angur aser iba atema tebilemtsü abentsüla" ta pai ashi.

Linük nung gari lendong balala

nung nisung lakh aika asüba atema Union Ministry of Road Transport and Highways-i state aser centre sorkartem külemi yaritepa road and safety infrastructure tajungba kümdaktsütsü ayongzüko go ta Longchari-isa ashi.

Nagaland nung district ajak nung District Road Safety Committees tentetogo aser parnoki küm piyong road safety programmes ayonga agia arur, ta paisa ashi.

Transport Commissioner, Elias T. Lotha-ia okila jembidang road safety ya kanga tongtipang kümogo ta ashi.

Gari lendong aser nisung taküm laluba khuret azüoktsü atema India sorkari National Road Safety Policy yanglu aser iba ya linük kübok road safety activities ajungkettsü atema inyaktsü lemtet, ta pai ashi.

"Gari lendongtem azüoktsü atema iba ya inyaktsü ta bushiteta takütem kümzüksü asoshi lenmangtem bushiteptsüla. Nagaland nung urban roads nung nisung teimba asür aser rural roads nung yiruyibong asür ta asadanteta lir" ta Elias-isa ashi.

Nagaland Road Safety Policy ya 2017 nungi bentshitsu tenzük aser iba ya state nung road safety aser tajungba kümdaktsütsü nükjidong nung yangluba lir ta paisa shisem.

Iba sentong nung Chief General Manager NICS New Delhi Jitender Kumar-i iRAD aser e-DAR metetdaksü.

## Longleng nung railway belt atema senden amen

**Dimapur, September 20, 2024 (TYO):** Dimapur nungi Tizit tashi railway lenmang yanglutsü dak sendakba nung MLA B. Bangtick Phom menden ser senden ka menogo.

September 19, 2024 nü Yonglok village, Longleng nung senden amen aser Longleng Deputy Commissioner W. Manpai Phom, SP Longleng, President Phom Peoples Council aser railway ajanga kongshiba Village Council tem aden.

"Longleng District telongtet nung railway mapatong takok ngudaktsütsü atema sendaktepa alir ajaki yariteptsüla" ta MLA Bangtick-i senden nung ashi.

Paisa yimtsüng ketdangsürtem dang iba mapatong inyaktsü atema No Objection Certificate (NOC) agütsütsü ayongzüker.

Dimapur nungi Tizit tashi railway lenmang yangluba ajanga

Longleng district kübok Yonglok, Shetep aser Namahching yimtsüngtem dak kongshir.

Yonglok, Shetep aser Namahching nungeri Dimapur nungi tenzük railway belt ajanga kongshiba yimtsüng/jilattem den külem senden amentsü asüngdangba senden nung mulunga agizük aser MLA-i ibaji Chief Minister dangi abentsü lemtet.

Ali kiburtem nem approved Government rate ama agütsüra No Objection Certificate agütsütsü ta senden nungsa lemtetogo.

Senden nung adenertemisa Longleng District nung alirtem asoshi Yonglok Village nung railway station ka lapoktsüla ta parnokisa lemtet.

Külen, item yimtsüng asem tebu Bura Namsang Village Council-i sorkari terenlok mapa inyakba nung ashishitep kecha mali ta metetdaksü.

## CM Rio-i Dimapur Municipal Office tasen lapoktsü



September 20, 2024 nü Chief Minister Neiphiu Rio-i Dimapur Municipal Office kima nung süngdong ka atemba angur.

**Dimapur, September 20, 2024 (TYO):** Nagaland Chief Minister Neiphiu Rio-i September 20, 2024 nü Dimapur Municipal Office tasenba lapoktsügo.

DMC office ya Integrated Business Hub and Innovation Centre (IBHIC), Forest Colony nung amenokogo.

Iba sentong nung jembidang CM Rio-i yimti aser jila nung municipal aser town council temi renloka aotsü atema master plan yanglutsü ayongzüker.

"Dimapur municipal nung councilor temi iba office tasen nungi nübertemi süoki ia tenzüksüla. Maongka den külemi tebilemtsü khurettem dena lir" ta pai ashi.

"Nagaland nung küm 20 tashi ULB elections magiteti aruogo aser iba ajanga kanga timtemogo. Tayongzüka jenti ajurua arur tanü ULB kümtetogo aser iba ya public lennirtem aser yimten

temlungtetba ajanga inyaketba lir" ta CM Rio-i ashi.

"Nagaland state sorkari local bodies shia nem Rs. 36 crore agütsügo aser iba ya tang nüngdakba mapatem inyaktsü asoshi lir. Sorkari Nagaland nung Eastern tesemtem nunga senotsü lemsateptsü lemtetogo kechiyong asenoki parnok züngdakra 16th Finance Commission nung temepishiba magütsütetsü" ta pai ashi.

DMC office ya IDAN-i anepaliba Forest Department office nung amenoka lir. Anungji councilors-i teti atema office building ka yanglutsü atema design ser Finance Commission ket nung agütsütsüla ta Rio-isa ashi.

Dimapur nung gari lenmangtem yanglutsüla, traffic tiptema ketdangsütsüla aser merükmejutsü nüngdaker. State sorkari DMC garbage dump site

mulunga agizükogo, iba nung Dimapur asoshi acre 10.74 aser East Dimapur atema acre 9.41 lemsüktsügo. DMC councilor temi leper atema tesemtem bushitsüla ta pai ashi.

"DMC-i Dimapur telongtet nung entry aser exit tax inyakyim ka tenzüksüla. DMC-i public parks anepalutsüla aser ali atsünga agiba ken o tem atema inyaktsüla. Traffic timtem ajema kümdaktsütsü atema marketing aser shopping areas renloksüla aser Dimapur ta senzusenbongertem anenzükdak asünung Deobarnü dokan aser hotel kar lapoktsü melatsüla" ta CM Rio-i tebilemba kar lemsatet.

Dimapur nung water supply ya kanga tongtipang kechiyong bore wells ajanga ali telung nung tzü agimar. Anungji DMC-i tzü tajemtsü tajung agütsütsü atema sentong ka atonga inyaktsüla ta pai ashi.

Paisa nübertem dang DMC den yariteptsü aser külemi amalitepa tajungba kümdaktsütsü mepishia metetdaksü.

"Dimapur nung alirtemi councilor tem dang nungi aika imlar. DMC-i jenjang repringshimtsü aser syndicate system den welfare unions agientsü teimla tulu yua lir" ta Labour, Employment & Skill Development Advisor Excise Advisor Moatoshi Longkumer-i ashi.

"Iba office tasen ajanga onok akasodaktsügo aser tejakleni aotsü. Onoki Dimapur nung khuret aser tebilemtsütem angateta lir aser temaba jenjangi atutsü atema inyakdar" ta DMC Chairman, Hukheto Yephthomi-i ashi.

## Backward Tribes atema Reservation Policy repringshitsüla: 5 Tribes Committee

**Dimapur, September 20, 2024 (TYO):** Nagaland nung Angami Public Organisation, Ao Senden, Lotha Hoho, Rengma Hoho aser Sumi Hoho ajanga Chief Minister dang Reservation Policy meyipa repringshitsü atema shidi ka züluogo.

"Backward Tribes atema Nagaland Job Reservation Policy ya tesüiba küm 47 tashi bentshia arudang parnok kanga ajangzüko go aser advanced tribes adena tuogo. Iba policy ya küm 10 shia meyipa repringshitsü latet saka 1989 nung sorkari tanga tetuyuba ka magütsü tashi tamshidak policy bentshia aotsü ta sangoktsüba sülen tanü tashi yamaji dang inyaka arudar" ta 5 Tribes Committee on Review of Reservation Policy-i CM dangi züluba shidi nung shia lir.

State sorkari tesüiba nung Reservation Policy atema luden balala shima mapa inyakja report tem tem bendena lir saka tilateri kar inyakba dak alaka luden balalai shidangba onüktem mapa maküm dang yua lir ta 5 Tribes Committee-i ashi.

Nagaland nung reservation system ka meyipa merepringshii dang ayuba ajanga Scheduled Tribes rongnung rongsenketzüng tsütsü meputep aser kin kar bendanga amshitsüsa tensa ajurutsü aser iba ajanga lokti nung mepetmesü adoktsü anungji state sorkari Nagaland Job Reservation Policy for Backward Tribes meyipa repringshitsüla ta 5 Tribes Committee-isa metetdaksügo.

State sorkari Nagaland Job Reservation Policy for Backward Tribes agientsüla

mesüra tanüngba unreserved quota ji kin pungu nem agütsütsüla kechiyong Nagaland nung Scheduled Tribe nütsüng yongsük nung onok 55% lir. Kin ajaki maongka kasasa angutsü aser tajungtem shimtetba den kin ajak kasa jenjang nung alitsü atema iba shidi zülur, ta 5 Tribes Committee on Review of Reservation Policy-i Nagaland Chief Minister dangi züluogo.

Iba shidi nung Convenor & Rengma Hoho Representative Er Tesinle Semy, Angami Public Organization Representative Zhatuo Kimho, Ao Senden Representative Limaaküm Jamir, Lotha Hoho Representative Zuchumo Mozhui aser Member Secretary & Sumi Hoho Representative GK Zhimomi nungertemi sign süa lir.

# Nagaland nung Symbios Green Energy-i anü tashi agütsütsü



Nagaland Water Resources Advisor, Wb. Tongpang Ozüküm-i Chümoukedima nung Waaree Energies Limited kongsang ka semzüksüba noksa nung angur.

**Chumoukedima, Sept. 20 (TYO) :** India nung anü tashi atsüzüka tesangwa agütsüba osettem Solar PV Modules yanglur, Waaree Energies Limited kongsang ka bener arua Chümoukedima, Nagaland nung yakanü lapokogo. Iba kongsang, franchise, ya Symbios Green Energy ajanga Nagaland nung anü tashi agi inyakba mapatem inyaktsü.

Chümoukedima nung yakanü Waaree Energies

Limited nungi kongsang ka razüka bener arua Symbios Green Energy teloki inyaktsü tenzüka sentong nung tongti tejaoker, Nagaland Water Resources department nung Advisor Wb. Tongpang Ozüküm-i jembidang, Symbios Green Energy ajanga Nagaland nunga anü tashi atsüzüka nübortem nungdak peritsütsü inyakba mapa ya Nagaland terenlok asoshi kanga tongtibang sentong ka asütsü aser iba yagi alima tzü mopong

meraksatsüi nübortem nungdak inyaktsüba mapatem nung tuluka yaritsü ta metetdaksü aser paisa parnok nem tenüngsang agütsü. Paisa Nagaland nung light tashi bushiba ajanga alima raksatsüsa masü saka tanabena meyipa bener arua agitetsüsa anü, mopong asr tzü nungi tashi agizüka amshitsüba maparen nung, talisa, lisopurtemi temulung agütsütsüla ta ajungshi.

(Maneni tapak 8 nung...)

# Fazl Ali College nung Commerce Stream ki lapokogo



Fazl Ali College Mokokchung nung Minister, Higher Education & Tourism, Temjen Imna Along-i September 20, 2024 nü Commerce Building lapoktsür külen tangokba noksa.

**Mokokchung, September/ Rongjui 20 (TYO):** Fazl Ali College Mokokchung nung September 20 nü Minister, Higher Education & Tourism, Temjen Imna Along-i Commerce Building renemer aliba lapoktsüogo, iba den külemi ano Minister-isa PM-USHA sentong kübok New Academic Building ka asütsü asoshi lungzüng azüngtsüogo. PM-USHA sentong kübok

New Academic Building asütsü lungzüng azüngba aser Commerce Building lapoker kelen Fazl Ali College Auditorium nung sentong tatsüka agiba mapang Minister Temjen Imna Along-i Fazl Ali College nung Commerce Stream lapoktetba ajanga Nagaland nung Fazl Ali College aser Dimapur Govt. College Multi Disciplinary College kümogo ta tenüngsang agüja

ashi. Nagaland nung mezüngbuba college Fazl Ali College lapoktettsüsa Chuchuyimpang aser Mokokchung yim anati nükla tajung yur alima ajangzükdaksütsü asoshi ali tenlaba ajanga tanu Fazl Ali College terenlok mapa jenti inyakteta takok jenti nguteta iba jenjang ya tongtetogo ta ali kibur dang pelaba olen ka shisem.

(Maneni tapak 8 nung...)

# iRAD/e-DAR training ka Kohima nung tenzükogo

**Dimapur, Rongjui/Sept. 20 (TYO):** Nagaland Road Safety Authority tawabangba kübok Nagaland nung aliba stakeholders atema ananü iRAD/e-DAR training sentong September 20, 2024 nü Hotel Vivor, Kohima nung tenzükogo. Iba training ya Motor Vehicle Department ajanga Ministry of Road Transport & Highways (MoRTH) aser Nagaland State Centre (NIC) aser NICS Central Team den lungjemer ayongzüka liasü.

Iba sentong nung Secretary, Transport Department, Robert Longchari-i anogoshi lenmang-

i tongti shilem agiba indang lemsatepa liasü. Road transport yagi meta tatsüba kumaka nisung takum nung lendong timba kuma takum samar aser yiruba lir, ta pai ashi. Nagaland tesem ajunga nung District Road Safety Committees tenteta lir aser küm tepiyong Road Safety Programmes tem inyaker, ta pai metetdaksü. Nagaland Road Safety Authority aser Supreme Court committee on road safety ajanga lateta yutsüba aser tuyuba ama Motor Vehicles Department ajanga ketdangüsü inyaker, ta ashi.

iRAD/e-DAR aruba sülen lendong atalokba osang agütsütsü aser road accidents asoshi teyari bushitsü atema maparen balala electronic yimya nung inyakba ajanga timtem ajurur alir nem anisüngzük agütsür aser tiazü nung teyari bushiba meteter, ta Robert Longchari-i ashi. Pai stakeholders ajunga dang iba maparen asoshi lungjemer team ka ama inyaka state nung lendong ajemdaksütsü aser road safety aser lenmang yangluba nung yaria tajungba kumdaksütsü ayongzü.

(Maneni tapak 8 nung...)

# DC Mokokchung-i travel advisory metetdaksü

**Dimapur, Rongjui/Sept. 20 (TYO):** Deputy Commissioner, Mokokchung, Thsuvisie Phoji-i sangdong ka nung, D.E.F Police Church nungi Yisemyong tsüngta NH 61 (New NH 02) Angetyong Tzu River area nung lenmang ulushitsü atema JKM Infra Work LLP Ivory Enclave, 1st Floor, RGB Road, Guwahati-12 Assam nem September 22, 2024 nikongdang 3:00 ako nungi

anung 10:00 ako tsüngta long poksatsü melaogo, ta metetdaksü. Iba mapa inyakba mapang contractor temi iba lenmang amshiba nübortem aser ki o jen kumzüka ayutsüsa Explosives Act/Rule, 2008 nung aliba ama inyaktsüla aser timtem ajurura JKM Infra works LLP khuret asütsü, ta sangdong ajangasa ashi.

# EMRS Diphupahar nung School Soil Health Card atema Gramn Sabha agi

**Dimapur, Rongjui/Sept. 20 (TYO):** Department of Soil and Water Conservation, Dimapur ajanga KRISHI VIGYAN KENDRA Jarnapani den lungjemer Eklavya Model Residential School Diphupahar nung kaketshir aser aluyimer tem den külemi School Soil Health Card atema Gramn Sabha sentong agia liasü.

Iba sentong nung menden ya Nrithung, Soil and Water Conservation Assistant liasü aser pai iba sentong nung shilem agirtem pela agizüka liasü.

Keveimeo Khatso, District Soil and Water Conservation Officer, Dimapur ajanga Soil Health Card indang jembia, koba ajanga ali tashi aitba aser maitba indang sayur ta ashi.

Soil Health Card report nung ajemdaker Agri and allied department temi nungdakba teyari agütsütsü atema sentong yanglur. Soil Health ya kanga tongtipang ta meteta Department of Agriculture aser aluyimer temi School Soil Health Card sentong tenzüka jelia Soil Health indang awareness agütsür, ta pai ashi.

Paisa süngdong-lidong nung macro, secondary aser micro nutrients indang jembia liasü. Senior Technical asst. KVK, Dr. Moanaro-i ali jenjang aser ali temu aser mozü kumdanga amshitsü indang jembia liasü. Iba sentong nung Pangerkumba Soil and Water Conservation Assistant ajanga melepzüng o jembia liasü.

# Methanellie Jütakhrie-i Hindi ken 'Daru-Daru' sayatsü

**Kohima, Rongjui/Sept. 20 (TYO):** Nagamese aser Tenyidie ken atener nungtugu Methanellie Jütakhrie Solo-i mezüngbuba Hindi ken 'Daru Daru' (whiskey whiskey) sayatsü lir.

Iba 'Daru-Daru' ken ya pai mejem aser paisa aten, kobai yi ajemba ajanga nisung ka tekolok aser shisatsü melenshiba indang ashir.

Iba music video yagi nisung ka yi agi meseper tangatetba aser shisadangba yimya

melenshiba indang ashir, ta pai ashi. Iba ken ya yi temaba jenjangi ajungkettsü atema masü saka yi agi timtem agütsüba awareness prokshitsü aser entertainment atema dang lir, ta kenteneri ashi. Iba ken ya September 22, 2024 nikongdang 1:00 ako nung pa indang official YouTube channel aser danga social media sapang tem nung sayatsü.

# Yimchalu nung 3rd Nagaland Photography Festival tenzükogo

**Dimapur, Rongjui/Sept. 20 (TYO):** Yimchalu village, Mokokchung nung "Capturing Serenity" omen nung ajemdaker asemnü atema 3rd Nagaland Photography Festival Brehostibarnü tenzüka liasü.

Iba sentong ya Photography Club Dimapur (PCD) ajanga Team Yimchalu den lungjemer photography temaba jenjangi ajungkettsü aser performing artist aser local entrepreneurs temi pei sempet aser pei sasa yanglutetba oset sayatsü asoshi sapang agütsütsü nükjidong nung ayongzüka lir.

Iba sentong moaja Chief Host, MLA & Advisor Law & Justice, Land Revenue, T.N. Mannen-i jembidang, asen takum nung photography ya tongtipang shilem ka kumogo, kechiaser asen takum nung

tatalokba balala tangoka aser wazüka ayutsü atema tongtipang hadir ka kumogo, ta ashi. Photography ya art ka lir aser iba yagi tenük agi angutsü otsü tejangja sayur aser tarutsü putu asoshi sobaliba senmang ka ama sobaliba aser oshi-oben tetsükdaksü alemyia oa record tem yutsür, ta pai ashi. Yimya shidak amshia aser tejangraba lira photography ya profession ka ama akumtsü jenjang tajung lir, ta Advisor T.N. Mannen-i ashi aser photography jangrar ajunga dang maongka agia iba benjongmung mapang pei sempet tali tajungba kumdaksütsü ayongzü.

(Maneni tapak 8 nung...)



September 20, 2024 nü Ranchi nung ICAR-National Institute of Secondary Agriculture (NISA) küm 100 ajungba mong sentong nung linük Tir, Droupadi Murmu-i exhibition stall ka semdangba mapang tangokba noksa nung angur.

### Haryana nung AAP mendenibo sorkar metentetsü: Arvind Kejriwal

New Delhi, September 20 (Agencies): Hokolbarnü AAP tongti lenir, Arvind Kejriwal-i, Haryana nung AAP teyari magiibo sorkar metentetsü, ta metetdaksü.

October 5 nü Haryana nung assembly election agitsü lia Hokolbarnü Kejriwal-i iba election atema party nüboyim sentong tenzüksüogo.

“Haryana-i temelenshi ka aginer. Haryana nung AAP teyari medenibo sorkar metentetsü. AAP-i menden kwi nung takok angutsüar ni asadangtetogo aser AAP teyari medenibo sorkar metentetsü, ta ni meteta lir,” ta taoba mapang Delhi chief minister Kejriwal-i metetdaksü.

Hokolbarnü Haryana kübok Jagadhari nung Kejriwal-i AAP candidate, Adarshpal Gujjar atema nüboyimja roadshow nung shilem agiogo.

“Kejriwal ya ochimashir ka, ta nüburtemi bilemra kü nem

(AAP nem) vote tagütsü. Ajsüaka parnoki ni ochishir, ta bilem nung ang kü nem vote agüjang. Delhi nüburtemi ni tanaben shim nung ang ni Chief Minister menden dangi meyiptsü. Ni maneni Chief Minister menden nung lila, ajsüaka ni menden nungi anentsü teletmetba agi aser teletmetba agitsü atema nüburtem nem dang tashi agütsü. Lenir shingaia iba ama tasütait tanela mesayu ta ni bilemer,” ta pai ashi.

Ano külen Ambala Cantonment nungi tokteptsü alisang BJP lenir Anil Vij-i Kejriwal aija pa dang, Haryana shilem tzü agüjang, ta ashi.

“Yangi (Haryana) nüburtem atema Arvind Kejriwal-i kechi agütsütsü? Punjab nung AAP sorkar lir, anungji parnoki tamasa Haryana nem tim tangutsü aliba tzü agütsütsüla,” ta Vij-i ashi.

October 5 nü Haryana nung

assembly menden 90 prongla atema election agitsü aser October 8 nü vote azünga election osang sangdongtsü.

Haryana nung Congress jenjang junga lir ama asadangteter, ajsüaka state election nung AAP-ia shilem agiba ajanga Congress jenjang ang raksatsüa akok, ta mongintemi asadangteter.

Haryana assembly elections atema Congress aser AAP longjemtsü tebilemba liasü saka party ana tsüngda menden lemsar tokteptsü jembiba nung obang meputepi liasü. AAP-i menden aika nung toktepnüa liasü saka Congress-i memelung, ibayongji party ana melongjemtet.

2019 küm Haryana assembly election nung AAP-i assembly menden 46 nung toktepa liasü saka ka nung danga takok mangu aser parnok indang vote shilemji NOTA (None of the Above) dang nungia ishiba liasü.

### MSP indang committee report sangdongtsü: Shivraj Singh Chouhan

New Delhi, Rongjui/ September 20 (Agencies):

Agriculture Union Minister, Shivraj Singh Chouhan-i, kobi melii sorkari minimum support price (MSP) atema committee report sangdongtsü, ta metetdaksü.

Tamalen Centre sorkari benokba aluyimba ozüing tasen asem anema linük nung aluyimertemi longkak sashia aitba sülen tesüsabo sorkari item ozüing asemji agientsüsa aküm.

Aluyimertemi mapang talangka longkak aita aruba sülen sorkari ozüing tasen asemprongla agien; item ozüing asemji Farmers’ Produce Trade and Commerce (Promotion and Facilitation) Act, Farmers (Empowerment and Protection) Agreement of Price Assurance and Farm Services Act aser Essential Commodities (Amendment) Act liasü.

Ozüing asemji agienba sülen sorkari MSP atema committee ka tenteta liasü.

Taoba mapang Agriculture secretary Sanjay Agrawal-i aniba committee jagi tang tashi nung senden 20 dak tema

menogo aser workshops aika agiogo.

Modi-i aniba sorkar kümsük (term) tasembuba nung agriculture ministry-i mezüngbuba anogo 100 tsüngda inyaktetbatem osangbenertem nem metetdaksüdang Chouhan-i, “Kobi melii onoki yimjak nung committee report ji sangdongtsü,” ta metetdaksü.

Centre sorkari committee dangji aluyimertemi alu nungi züsentetba aonsotsü aser chiyungtsü balala atema aluyimertem nem MSP agütsütsü asoshi, maparen teladak asütsü asoshi, mozü mamshii aluyimba aser aluyimba yimya melenshitsu asoshi tebilemba onüktem benokang, ta metetdakja liasü.

Aluyimertem den tongtepratepa inyaksü atema Chouhan-i ‘Adhunik Krishi Choupal’ ta ser mapatong ka tenzükogo. Iba programme nungji scientist temi aluyimba tsütsü tasen purapiteta inyakba tasa balala lemsateptsü, aser iba sentongji October ita nungi tenzüka sayatsü.

### Uttar Pradesh nung tebur kati tejashi nung par jala pezübuba tepset

Lucknow, September 20 (Agencies):

Uttar Pradesh nung tebur kati tejashi nung par jala kinü tanur ka tepset, ta police-i metetdaksü.

Arrshi küm 30 tebur kati tanur pezübubajibo tebur asotsü imlaa liasü, saka maneni tetsür dang asoba agi pai kinü tanurji ali nung merepdoka tepset, ta police-i metetdaksü.

Police-i Bablu Diwakar ji puogo. Amongnü pai tejashi nung yi jemer kinü tanurji tepset. Senior Superintendent of

kinüngtsü tenata jala ka sosem. Taoba ita nung tanur pezübubajia tetsürsa aso, ibayongji pa kanga jashia liasü,” ta metetdaksü.

Amongnü (September 15) Diwakar par tsüraburtem den raratepba mapang nung pai par jala kinü tanurji kinüngtsü ket nungi rakzükba sülen ali nung merepdaksü, iba sülen kinü tanurji kanga mejungi yirua hospital-i anir ao saka mekümsükteti Bodhbarnü süadok.

Police, Sanjay Kumar Verma-i, “Diwakar o mezüngbuba kinüngtsü na jala ana sosema liasü, iba sülen pa kinüngtsüji süadok. Pa tanaben kibong akümba sülen tanabuba

Diwakar kinüngtsü, Deepu-i ashiba kuli nung ajemdaker Diwakar anema ken o ka benokogo aser Brihostibarnü pa pua jail nung puokogo, ta police-isa metetdaksü.



**Government of India**  
Ministry of Chemicals & Fertilizers  
Department of Pharmaceuticals



# JAN AUSHADHI

Branded mozütem den medemdangra mozü quality tajung jenjang dalang agi **50%** nungi tenzüka **90%** tashi jenjang ajemer agütsütsü



**13000+** Jan Aushadhi Kendra



**2000+** Mozü Quality Tajung



**300+** Surgery Nung Amshiba Osettem



Scan QR Code



For more information download “Jan Aushadhi Sugam” mobile app

www.janaushadhi.gov.in

National Toll Free Helpline **1800 180 8080**

**NORTH EASTERN INDIRA GANDHI REGIONAL INSTITUTE OF HEALTH & MEDICAL SCIENCES. MAWDIANGDIANG, SHILLONG-793018**

**Advt. No. NEIGR-GAD (RC)/14/2023/80 dated: 30th July, 2024**

The Director, North Eastern Indira Gandhi Regional Institute of Health & Medical Sciences (NEIGRIHMS) Shillong-i deputation nung iba Institute nung Group ‘C’ post atema application meshir.

Sl. No	Name of post	No. of posts	Pay Scale	Mode of recruitment
1	Upper Division Clerk (UDC)	3 (three)	Level-4 of Pay Matrix (Rs.25,500 - 81,100/-)	By Deputation (ISTC)

Temsüa aliba telatetbatem, educational qualification, küm aser experience ama osang tejanga metetsü asoshi aser prescribed proforma download asütsü atema Institute indang website: <http://www.neigrihms.gov.in> nung repringang.

Prescribed Proforma nung tabensa applications ji proper channel ajanga “Recruitment Cell, General Administration Department”, North Eastern Indira Gandhi Regional Institute of Health & Medical Sciences, Mawdiangdiang, Shillong-793018 nem agüjang aser temalenji “Application for the post of .....” ta züluang

Application agizüksü atema tatembangbuba anogoji Employment News nung iba Advertisement agütsüba anogo nungi tenzüka ita ka tashi alitsü.

Sd/-  
Deputy Director (Admn)  
NEIGRIHMS, Shillong

CBC 17119/11/0007/2425



# TIR YIMYIM

## YIMOBILEM (EDITORIAL)

DIMAPUR

KÜPTOKNÜ

RONGJUI 21, 2024

### ILP jenjang atur

Nagaland nung Inner Line Permit ozüng akangshia amshitsü atema, talisa, Naga nung kaketshirtemi kanga sashia jembiba mapang, Nagaland government-ia süoki ia inyaksü tenzükba tamaisü kaji, ILP agütsüba sen jenjang atuba ya asütsü. Atangji, bendangertem Nagaland-i arutsü ILP nüngdakbaji Nagaland government atema senotsü lenmang bushiba sentong ka masü saka bendanger ket nungi Naga nung li aser Naga nung sobaliba kümzüka ayutsü atema latetba ozüng aser inyakyim ka lir. Ajisüaka, ILP ya kaket ka dang masü saka jenjang keta amshitsü atema ILP agütsüba tsüda sen meshir. Iba sen jenjangji tang nungi India nung raliwalirtem dang sen 200 aser bendanger raliwalirtem dang sen 300, India nung shishilembar shia dang anogo 90 atema sen 300 aser küm ka asoshi yanglura sen 1000, ayangertem dang sen 150, technical nisungtem dang küm ana atema sen 1500, putirtem dang küm 3 atema sen 1500, tesayurtem dang küm 3 atema sen 1500, kaketshirtem mezüngtem tashi mesüra küm 5 atema sen 300 aser Naga nungertem den külem ser business inyaktertem dang küm 3 atema sen 5000 meshitsü Nagaland government-i telatetba tasen ka agiogo. Iba denji külemi ano tang nungibo ILP ya nisung tsüngdong oagi senotsü tsütepa ILP meshitsüba masü saka online nungi dang ILP meshia agizüktetsü, anungji ILP meshirtema Nagaland tonga marudangyongi ILP agizüka bener arutsü aser ILP atema agütsüba senji indangindanga government senpongi yoktsü, anungji ILP ayokba sen agi Nagaland asoshi mapa tajung kabo inyaktetsü. Atangji, itemjibo asenoki angateta lir saka asenoki ano tali tejangjaba angatetsü nüngdakbaji ILP ya shirnok nem agütsütsü ta asüba ya angatetsü nüngdaker. Asenok karibo ILP ya India nung alir tzümartem asoshi masü saka Bangladesh nungi arur Miya nung ayangertem asoshi danga ta bilemer. Ajisüaka, ILP ya, tongtibangsa, India nung tzümartem asoshi latettsüba sentong lir, kechiyong India nung tzümartem asoshi kecha talenba aser tenokdangba ka melii Nagaland nung sademsadema arua kibur küma alitsüsa temeten agütsüra, küm ishika tsüngda Nagaland nung ali ajak ya tzümartem meyong kümadoktsü, kechiyong asenoki timtem marem parnok dang ali ayoktsü. Idangjibo lisopur pei lima nung talidak maka bendangertemang lisopur kümer parnok kübok kilir mapa inyaka alitsü. Kasaji, Naga nungersa asüyonga tanga state-tem nung alirtem asoshibo ILP ya nüngdaktsü. Aji oda, ILP ya shitak mapa küma mamshitetra, bendangertemjiang alia parnok tuluba, nüboa parnok teimba aser rongsen nunga parnok takarba ta kümadaktsü, Naga nung parnok kidang kilir mapa inyaka alitsüsa akümtsü. Iba amaji mataloktsü atema British nungertemi India nung yimsüsüba mapang 1873 küm lateta yutsüba nungi tenzüka tang tashi iba ozüngji meindoki putu yimya aser mapa dak apet, tang amaji, yanglushir takangba amshitsü meranger. Atangji, ozüng ajakji shitak asütsü, kechiyong nübertem ajungtsü aser ajangzükdaktsütsü asoshi ozüngji yanglu saka ozüngji ozüng amshitsü purtemi mapa küma mamshitetra ozüngji tazüngla akümer. Kasaji, Nagaland nung yi meyanglutsü aser mayoktsü latetba ozüng yaa ka asütsü. Kasaji, ILP amshitsüba ozüng ya lateta yur, ILP mittsü pur mali aser ILP agütsüba inyakyima shitak tenteta maka, ILP agütsü dang meshiba senotsübo kongia aoar memetet ta Nagaland nungbo ozüng ya ozüng yanglurtemi masü saka ozüng raksartemiang amshira, asüng Nagaland ya Nagaland masütsü. Joko, tangbo Dimapur, Niuland aser Chümoukedima district-tem nunga ILP nüngdaktsü, anungji, talisa, Dimapur nungbo National Highways nung Nagaland gate yanglua akadakji dang masü saka Railway station, Airport aser Assam len nungi Dimapuri aruba lenmang tila tulu ajak nung mikar nokdaktsüsa akümtsü. Iba mitkar mapaji anogo piyong anü pua aser tzünglu ajaa meinyaktetsü, anungji ILP bener arurtemia akümtsüba rebrangtsüsa ILP mitdak süngküm shia nung mitkartem amendak kiojen junga alitsüla aser mitkartemji sübutsü tashi nung jetperaa keta sübor nokdaktsüla. Iba jagi Nagaland kümzüka dang masü saka mera akettsü.

## OLEMSABANG

### TANUR ANEPALUBAREN

#### Teka-temopu-asertebang tashidak



Teka-tetsüng-asertebang tashidak kinü aser tila tanurtem dak atongba tashidak ka lir. Kinütem dang iba tashidak ya adoktsü anasa temang metatsü, tipmatemtsü aser chiyungtsü jangratema machitsü. Iba sülen anogo 2-3 tsüngda, tebang telong nung komo adoktsü aser tebang nung adokba sülen teka aser tetsüng nung komo adoktsü. Iba tashidak ya ajungbena dang adoker aser anepalu masüyonga, anogo 7-10 tashi nung jungadoker.

Teka-tetsüng-asertebang tashidak ya enterovirus telok ta ajaba mesentem ajanga adokdaktsür aser mesen tongtibaji coxsackievirus A16 lir. Iba mesen ya mela-mela menateper aser teni mesüra tebang nungi aliba tzü mesüra scü ajanga menateper. Iba tashidak ya tatsüktalem mapang aser asükwa atongtsü mapangtem nung kanga bulua adoker.


Teka-tetsüng-asertebang tashidak ya mapang tatsüka atema dang lir, anungji iba atema anepalutsü balaka mali. Iba tashidak atonger indang scü nung mesenji ita ki alitsü akok anungji memenatepdaktsütsü merangang. Nür tanur indang teka aser tetsüng mapang shia tzü agi shidokjang, talisa metsümeshiba sülen ibaji inyakang. Tanur temang kanga metaa shirangra mesüra tashitsü atura Acetaminophen (Tylenol®) mesüra ibuprofen aliba mozü chidaktsütsü akok. (Arishi küm 12 teküpok tanur nem aspirin techidaktsü)

Teka-tetsüng-asertebang tashidak agi shiranger tanur nem tzü peria jemdakjang. Süngjang tzü jemdaktsüba dang nungibo mamatsü enoka yangluba tzütem agütsü tajungba.

Tanur shirangba manenra mesüra tamajungba kümra doctor dangi anir oa anepaludakjang.

Source - Internet

### Lanurtem stroke timtem



Stroke timtem ya pei dak dang aket, kechiyong iba timtem atalokbaji achiajem aser libaliro dak tuluka keta lir. Nü temang touzükji nü tar den mesütep taret süra mesüra amui junga mao yi kanga ajemer süra, iba timtem jagi atongtsü ana nung dang lir. Germany nung

Researcher-temi bushitetba agi, stroke asüba lanurtemji teimbaka moko achir, temang marazük kazüa alirtem, kanga shisabolua alirtem, cholesteroil tali alirtem, temang tali yiradaktsürtem, yi kanga ajemertem aser junga memejangertem liasü. Stroke asüba ya tapu ana lir, kaji tain akümba agi ataloker aser kaji achiajem aser libaliro mazüokba agi ataloker. Anapronglaji temang arakzüka aliba aser achiajem nung küm dangba ajanga nokdangtettsü.

Source - Men's Health

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

## Nagaland Joint Christian Forum kum 25 ajungba mong among



**Kohima, Rongjui/September 19 (TYO):**

Brihostibarnü Nagaland Joint Christian Forum (NJCF)-i parnok kum 25 ajungba mong Platinum Hall, NBCC, Bayavü nung ayongzüka mongogo; state tesem ajaklen Khristan denomination balala longjemba sülen kum 25 ajungba mongji "Fostering Unity in Christ" omen nung ajemdaker among.

NJCF Tir aser NBCC General Secretary, Rev. Dr. Zelhoy Keyho-i, iba lokti senden ya alizung ka atongba temaitsü lir, koba ajanga denomination balala nungi zungsemtem longjemdaksütsü atema inyakba sayur, ta ashi.

Paisa, "Nisung 20 longjemdaksütsü-a mapa temela masü saka tanü asenok yangi noklang aika longjema lir," ta ashi.

Keyho-isa, tarutsü lanurtemi maneni NJCF mapatongtem tejakleni bener aotsü imlar aser kum 50 ajungba mong nungbo iba dang nungi nisung teimba

longjemer alitsü imlar, ta ashi. Paisa iba Forum nung tetsürtema aika zungoktsüla, kechiyong tetsür aser tebur napronglai shilem agi nung ang tarutsü tia tajungba latetsü, ta ashi.

Tsüngrem O jembidang Keyho-i NJCF-i Laishiba nung ajemdaker inyakba metetdakja Arogotem dang Tsüngremi yangluba lima anepalurtem asütsüla, ta ashi.

Paisa, alima yimya nung Arogo memelenshitsüla, saka Arogo teinyaktsüji alima yanglushitsütsü atema lir, ta ashi.

Paisa "Khrista makaba Khristan yimsü," atema tekümdangtsü metetdaksü, koba ajanga tema tereprangtsü agi tanela ainba amoksepdaksür, ta ashi.

Keyho-isa Khristan denomination balala tsungda longjema alitsü nungdak, ta ashi.

Helen Keller-i jembiba o lephsia pai, "Kijaibo asenoki tilaka dang inyaktetsü, saka

longjemerbo asenoki aika inyaktetsü," ta ashi.

Paisa Arogo nung tenükmerem aser telemsa adokdaksüba nungi pilaa alitsü saka Arogo tashi itdaksüba nung pei teinyaktsü shilem angateta inyaktsü ayongzük.

2024-29 kümsük atema NJCF Tir tasenba, Rev. Dr. N. Paphino-i menden nungi anisungzüker ketdangpurtem dang pelaba lemsatepba den külemi Rev. Dr. Keyho aser Khyomo Lotha na dang iba Forum nung advisors ama inyaktsü mepishi.

Iba sentong nung Khyomo Lotha-i salem osang aben, Rev. Zhabu Terhüja-i o tatsüka jembiba aser Arogo balala nungi ken agi shilem agia liasü.

NJCF ketdangpur tasenpurtemji Vice President, Rev. Dr. Vevo Phesao, Secretary, Rev. Dr. Moses Murry, Joint Secretary, Rev. Fr. Dr. Pezalhoukho George Rino aser Finance Secretary & Treasurer, Dr. Khontele Seb nungger lir.

## ANOGO ABEN TSÜNGREM DEN

### Tanelaji teremsep 1 Tesa. 5:19

Alima nung Tsüngrem mapa matalokdaksütsü asenoki nokdaksü makok saka asenoki Pa tanela asenok taküm nung remseptsü akok. Asen taküm nung Tanela Temeshi mapa inyaktsü Tsüngremi asenok nem nüji agütsü. Kodang tanelai ashiba tashi mangalir, mesükshi-i yutsüdir, mesüra sentokdir asenoki asen taküm nung pa remsemdaksür. Isaia ainkari iba nungi adokba rasaa ashir: "Aser Pai ashi, oang aser iba nübur dang shiang, atangji nenoki angashir saka mangatetter, nenoki atangji angur saka memeteter" (Isaia 6:9; Mathi 13:14-15).

Kodang nai temenen menadir, Tanela Temeshi-i nü dang temulung meyiptsü ashir. Nai ashi mangai toktsüra aser temulung memeyipra Tsüngrem O nung ne mulung meranga akümtsü. Tsüngremi ne taküm asoshi mulunga aliba jembira aser nai aji songtemra, ne taküm nung Tanelai-i mejembitsü mapang ka arutsü. Tanelai jembiba nai maneni sentokra Tsüngrem nungi joko nai kecha O mangashitsü. Nai maneni Tsüngrem O nung tekong merangra, Pai ne nem O tasen kecha magütsütsü. Ne taküm nung Tanela Temeshi ola menokdangtsü kümdangang. Pa tanelai-i ashiba ajak nungbo na sünepba malitsü saka Pa O-i na talubusa taküm dangi anitsü.

## Sub-Saharan Africa nung Khristan million 16 tesem balala nung jenshia lir

**September 20, 2024:** Linük 60 dak tema nung Khristantem reshikangshiba mita reprangba Khristan melungtet telok, Open Doors-i ashiba agi, sub-Saharan Africa nung nisung million 32 shi tesem balala nung jenshia lir aser iba nungjagi million 16.2 bo Khristantem lir.

Islamic kiralongrar telok balala den Fulani Muslim nungertemi tesüiba kum ter tsungda aluyimer Khristan meyrjang aika tepsetogo.

Nigeria nung aliba displacement camps nung Pastor Barnabas densema Khristan million aika lidar. 2019 kum pastor Barnabas den par adianu ka aser pa adianu kinüngtsü nungger alu nung aliba mapang nung Fulani teloki amakdang tena tepset aser pastor dang kümsüka liasü.

Kiralongrartem jagi süng agi pastor Barnabas teka sükdangja liasü. Iba lendong nungjagi pabo kümsük saka par adianu Everen aser adianu kinüngtsü, Friday nabo asü.

Barnabas-i, "Ni akaba ajak samaogo. Ozü kidang aliba ajak rongdok aser ozü yim rongdoktsüogo, anungji kü ket nung kecha mali," ta ashi.

Tesüiba kum pongu tashi Barnabas aser par kibonga süki tilaka nung lidar. Camp nung alirtem anogo shia chiyungtsü agi kanga anünger.



Nigeria kübok Pulka nung aliba IDP (Internally Displaced People) camp nung alirtem telok ka tangokba noksa nung angur.

IDP camp nung Barnabas ya Khristantem atema pastor inyaker.

Barnabas-i, "Yangi Nigeria nung aser Africa nung Khristan million aika jenshia lir. Onok tamang nung dang lidar," ta pai osangbener dang ashi.

Open Doors organization-i Nigeria kübok state ana nungji osangtem bendena report tasen ka sayaogo. State ana nungji Khristantem aika jenshiogo aser Nigeria ya alima tesem ajaklen top 10 IDP camp teimba aliba linüktem rongnung densema lir.

Barnabas-i, "Jenshia aliba Khristantem teimla makai kümogo. Camp nung pastor ka ama parnok nem agütsütsüsa kü ket nung kecha mali. Onoki longjemer sarasademer aser Tsüngrem O lemsateper. Onoki Tsüngrem dak dang rangloker. Onoki Pa dak dang teimla ayur. Onoki imlaba dang nungi tali Pai inyaktsü ta onoki amanger," ta metetdaksü.

Alima nung Khrista dak amangertem atema tesem tamajungtiba rongnung sub-Saharan Africa densema lir, ta Open Doors-i metetdaksü.

"Kiralongrar telok balalai amakba ajanga Khristantem dang masü saka tanga yimsü amangertema takoksa angur. Boko Haram telok, Islamic State of West Africa Province (ISWAP) aser Fulani telok balalai Khristantem mesüra Khristan yimtsüngtem amaker, alu raksatsür, Khristan lenirtem aser Tenla kitem amaker," ta Open Doors-i metetdaksü.

"Khristantem amakbaji Nigeria state security sepaitemi mapang shidak nung menokdangteter. Khristantemi security sepaitem dak melung

melemteter. Ketdangsertemi item ama tatalokbatem menokdangtetba agi tensa tamajungba akümer aser nisung teimbateimba jenshir," ta kasa report ajanga metetdaksü.

International Organization for Migration-i ashiba agi, Nigeria nung IDPs camp shilem 74 bo Borno state nung lir. Yaküm December ita tashi nung Bornos state kija nung IDPs camp nung nisung million 1.7 liasü.

Yaküm December ita tashi nung Plateau state nung IDPs 54,457 liasü, ta Open Doors-i metetdaksü, ajisüaka Mwaghavul Development Association-ibo Plateau state nung IDPs ji iba dang nungjagi teimba lir, ta ashir.

Open Doors CEO, Ryan Brown-i, alima nung Khristantem atema region tamajungtibaji sub-Saharan Africa lir; iba region nung yimsü nung ajemdaker nisung jenti tepseter, ta ashi.

Open Doors indang "No Road Home" report ajangasa osangbenertem dang sub-Saharan Africa nung Khristantem aika jenshiba indang osang alima nem metetdaksütsü ayongzük.

Open Doors-isa anüolen aliba linüktem dang iba region nung reshikangshiba Khristan adianutem atema ola adoktsütsü aser sarasademtsütsü ayongzük.

AO OSHI ANGAZÜKDAK: TANÜ ANGAZÜKTSÜBA OJANG



Tangar

(adj) asen masü pi, tebanger (others)
\* Asenok ya tangar asoshi alitsüla.

Tangashir

(n) tenarong ajanga meteterem, angaa alirtem (hearer)
\* Tsüngrem o jembir ajanga tangashir ajak temoatsü angu.

OLONG PAITEP # 6930

Grid for crossword puzzle #6930 with numbered starting points.

TIPILEN :

- 1. Tzü benshiba aou - (6)
2. Meshiyonga ao - (4)
4. Teimba aküm - (6)
7. Lai nung ainkar ka - (4)
9. Süngküm lanu - (4)
10. Tapok - (4)
11. Kisüng - (4)
14. Lai nung tanabuba kaket- (6)
15. Ani \_\_\_ zük - (4)
16. Tepu meyidak - (6)

LANGTSÜNGLEN :

- 1. Azüzükba shisatsü - (8)
2. Nemjema bilem - (4)
3. Tentet - (4)
5. Temechi - (4)
6. Kishi den tilaba apaba - (7)
8. Tekolok-i agütsüba - (8)
10. Yagi menemer - (4)
12. Zükolak tzü - (4)
13. Bangsemo lendok - (4)

OLONG PAITEP # 6929 TELANGZÜBA

TIPILEN :

- 1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

NAI-A YA METETTER MA



Zhao Yitong aser lar coach Wang Huanan nati Guinness World Records certificate ka nguogo. Zhao ya Songjiang East Road Primary School nung class 3 kaketshir ka lir aser lai minute ka nung "most double under skips on alternate legs" otsü yanglutet.
La arishi küm 5 asüdang rope skipping angazük aser 2021 küm lai mezüng national online rope skipping competition nung shilem agidang takok marok ana nguteta liasü. Tang tashi nung Zhao-i national championships 25 aser international championships 3 nguteta lir.

Union MoS-i Guwahati nung Central Animal Facility lapoktsü



Guwahati, September 20, 2024 (Agencies): Union Minister of State for Education and Development of North Eastern Region (DoNER) Sukanta Majumdar-i Hokolbarnü Guwahati semdangogo.
Tanü MoS Majumdar-i National Institute of Pharmaceutical Education and Research (NIPER) semdangdang Central Animal Facility (CAF) aser in-vitro drug testing facility lapoktsü.

"Northeastern region nung NIPER lapokba ajanga drug discovery aser chemical renolokba wadang nung tajangzük aika angutsü. Iba wadang nung research, education, knowledge aser business ajungkettsü" ta Majumdar-i Central Animal Facility lapoktsüdang ashi.
"Linük nung pharmaceutical research aser innovation tashi itdaksütsü asoshi onoki item facilities lapoktsür. Iba ajanga developed

aser self-reliant India akümtsü" ta pai ashi.
NIPER-Guwahati ajanga drug discovery atema high-quality laboratory animals amshitsü nükjidong lir.
Tanü MoS Majumdar-isa Gauhati University semdang aser Centre for Brahmaputra Studies lapoktsü.
"Iba ya research asoshi dang masü saka Brahmaputra ayong tajungba angatetsü aser tayongzükbatem koktetsü atema lir" ta Majumdar-i ashi.

Pradyot Debbarma-i Bangladesh nung lisopur amakba aitsür

Agartala, September 20, 2024 (Agencies): Bangladesh kübok Khagrachari nung lisopurtem amakba atema Tipra Motha party founder Pradyot Debbarma-i tebilemtsü abenba metetdaksüogo.
"September 19 nü lisopurtem amakdang ki aser dokan 100 tema raksatsü. Bangladesh Army personnel den yaritepa ozüng alema aruba Muslim nungeri iba mapa inyak" ta Debbarma-i ashi.
"Khagrachari aser Bangladesh kübok tangalen ozü

lisopur adianutem amakba atema tebilemtsü abener. Ozü party-i India nung nübo agi tangar memepertem temeten atema inyaker aser Bangladesh sorkar dang kasa mapa inyaksü ayongzük" ta pai ashi.
Debbarma-isa India sorkar dang policy tem meyipa reprangshitsü aser Bangladesh nung atalokbatem nung tenük yoktsü ayongzükogo.
September 15 nikongdang 5:00 ako meta Khagrachari kübok Boalkhali aser Dighinala Sadar nung lendong atalok ta

osang angazüker.
Rights & Risks Analysis Group (RRAG) Director Suhas Chakma-i iba tatalokba aitsüogo.
" Sheikh Hasina'er sorkar atsüngdokba sülen sorkari metongjemi inyakba ajanga iba lendong atalok. Chief Advisor Mohammed Yunus-i September 17 nü Bangladesh Army nem magisterial powers agütsü aser iba ajanga Chakma nunger kiojen rongdoktsü aser Dighinala Sadar area nung Chakma nunger ka danga mali kümogo" ta Suhas Chakma-i ashi.

Manipur nung Minister ka indang personal assistant pur ao

Imphal, September 20, 2024 (Agencies): Hokolbarnü Imphal East district nung mejangjatetba nisung kari Manipur Consumer Affairs Minister L. Susindro indang personal assistant pur ao.
Tanep 8:30 ako meta Somarendro indang personal assistant pur ao. Pa kechi atema

pur ao'ar mejangja aser bushisüngdang ka tenzükogo.
Arishi küm 43 tain personal assistant pur aoba tesem nung 9mm indang injang terep 5 ngutetogo. Iba ajanga pa apuba mapang khatetpa kuli agütsür ta police-i ashi.
Bishnupur district nunga Brihostibar aonung

mejangjatetba nisung kari taoba Chief Secretary Oinam Nabakishore'er kidang injang khaloktsü.
Iba tatalokba nung nisung yiruba mesüra asüba kecha maliasü. Iba tesem nunga 9mm injang tazüng ngutetogo aser telok shingiaia tenüng agiba osang mali.



September 20, 2024 nü Border Guards of Bangladesh (BGB)-i Border Security Force (BSF) ket nung Tripura nunger ka agütsüdang agiba noksa angur. Iba nisung ya Challa Fru Mog lir aser Bangladesh nung pa pua ayu.
September 19 anepdang 10:30 ako meta South Tripura district nung alir Challa kinungtsü Swapna Mog-i BSF Coy Commander dang la kinungbo Bangladesh nung apuba osang metetdaksü. Idangjisa BSF-i BGB den osang tongtepratep aser parnok yaritepa Challa Fru Mog kümzük. Challa Fur ya September 13 nü Bangladesh-i kinunger ka den ajuruteptsü atema ao. Pai Belonia nung aliba Land Custom Station ajanga passport aser visa shitak bener ao saka pa meyipa arudang Bangladesh nunger kari apu aser pa chioktsü atema Rs 1 lakh meshi.

**GOVERNMENT OF NAGALAND**  
**DIRECTORATE OF HEALTH & FAMILY WELFARE**  
 NAGALAND: KOHIMA  
 NO. DHFW-5-23/TRG-NSG/2022/8210-11 Dated, Kohima, the 20th September 2024

**NOTIFICATION**

This is to notify that the result for the GNM and FHW/ANM written Examination 2024-25 is uploaded in the Department website www.nagahealth.nagaland.gov.in and also in the notice board of the Directorate of Health & Family Welfare, Nagaland Kohima.

**(DR. E. MOTSUHUNG PATTON)**  
 Principal Director  
 Directorate of Health & Family Welfare  
 Nagaland: Kohima

**GOVERNMENT OF NAGALAND**  
**DIRECTORATE OF TECHNICAL EDUCATION**  
 Nagaland : Kohima - 797 004

NO.DTE/CON-IST/1/2024/ Dt. Kohima, the 20th September 2024

**NOTIFICATION**

Pursuant to Govt. Adm Approval NO.HTE/RESERV/34-4/1471 Dated 19th September 2024, the interested candidates are informed that the Dept. Of Technical Education shall be conducting counselling on the course mentioned below for studies under 'Kerala Academy of Pharmacy' on 24th September 2024 in the conference hall of the Directorate of Tech Edn, Kohima from 11:00 A.M onwards.

Name of the Program	Seats Offered	Actual Fee without Scholarship	Scholarship, for students nominated through Dir. Of Tech Edn
B Pharm, Kerala Academy of Pharmacy	25	₹8,93,000/- { Full course fee + Hostel Fee }	₹25,000/- waiver in the First Year + Uniform & Books Free
D Pharm, Kerala Academy of Pharmacy	15	₹3,31,000/- (Full course fee & Hostel Fee)	-do-

(Er. Vipulhou Lhoungu)  
Director

**Menungra Bilemteter**

Temeim Oba, Oko aser Obou, nai onok iba akümüli nung toktsür oadoker, tanü küm ka renteta arudang, ne temeim mapa tajungtem bilemteta onok mulung kanga rongjenseta na menungraa amonger ani.

**Temeim,**  
**Kinungtsü,**  
**Chirnurtem,**  
**Semchirtem aser**  
**Kinungertem.**



**Akangchiba Pongen**  
 (Chuchuyimlang)  
 05.01.1962 – 21.09.2023

**ALI TAYOKTSÜ LIR**

SHOKHUVI East Near VIDEVIMA Village gate road.  
 Ali tasazük kechi aginür ajak angutsü. Sq.ft. 150/- Negotiable.  
 Aser NIHOTO nung Sq.ft nung 190/-  
 Contact: 9362993773 / 9362194700

**Election nung takok mongura Jewish voter tai asütsü: Trump**

Washington, Rongjui/Sept. 20 (Agencies): Republican presidential candidate Donald Trump-i November ita election nung pai tamakok ajurura Jewish-American voters tenüng asentsü ta ashi.



Washington, DC nung Israeli-American Council National Summit nung jembidang American Jews tem asoshi pa den tokteper Democratic Party nungi tatong tir Kamala Harris jenjang tajungba ta jembiba atema pai sasa ashi.

“Ni iba election nung takok mongura – aser yamaji atalokra Jewish nüburtem asoshi teinyaktsü jenti lir, kechiaser nübur shilem 40, masü shilem 60-i tsükchir atema vote agütsür – Israel, kü tangatetba nungbo, küm ana tsüngta samatsü,” ta Trump-i Brestobarnü ashi.

November 5 tir election result atema Jews nunger danga tenüng asentsü, kechiaser parnoki Democrats atema vote agütsütsü amai lir, ta Trump-i ashi.

Pai tenüng metetshi poll ka indang jembiba mapang

American Jews shilem 60-i Harris nem vote agütsütsü sayur ta ashi.

Taoba tir yagi Israel aser Jewish nunger den tesendaktep tajung aliba indang nüma danga jembiba aser Israel nung US Embassy Jerusalem-i belenba nunga pai shilem tulu agiba indang shia liasü.

Linük nung Jewish nunger anemba aija US yimtiba nung senden tanabuba alidang, Democratic Party yagi Jewish Americans sempar aser ni Jewish nunger vote noklang shilem angutsüla, kechiaser ni Israel asoshi tajung inyaker, ta Trump-i ashi.

“Ni Jewish Americans dang ya nangzüker: Nenok vote

ajanga ni nenok kumzüka ayutsü aser White House nung ni Jewish Americans asoshi tembar tajungtiba asütsü. Aser tanga ni nenok tembar tajungtiba lir,” ta Trump-i iba sentong nung ashi.

US nung aliba Jewish nungeri küm aika federal elections mapang Democrats tsütsü timba aor aser tanga yamaji lir. Ajisüaka yangji tera melenshiba ajanga November ita takok angur jangjatsü.

Trump telok asoshi tongtipang state tem nung Jewish nunger atsür arutsü ya tongtipang kumogo.

Tatishitsü agi Pennsylvania nung Jewish nunger nisung 400,000 dak tema lir, kong 2020 küm Joe Biden-i votes 81,000 agi takok angu.

Trump-i iba o mejembidang Harris campaign asoshi otongtar Morgan Finkelstein-i sangdong ka nung Trump-i mapang shia anti-Semites den sensaktepba asoshi aija liasü.

Pa Jewish nunger anemer ta aitsüba Trump-i magizük aser par jala kinungbo ya Jewish nunger lir ta shi.

**Central Europe nung tzümetsüng agi kongshia lir, nisung 24 süogo**

Wroclaw, Rongjui/Sept. 20 (Agencies): Central Europe nung tzümetsüng agi kongshia aliba linüktem yaritsü atema European Union-i akaba sen ajak amshitsü, ta European Commission Tir Ursula von der Leyen-i Brestobarnü ashi.

Küm 20 shi tsüngta tzümetsüng tesashitiba agi central Europe nung kongshia Romania nungi Poland tashinung teraksa jenti bener arutsü, nisung 24 shi takum sama, apu raksatsü, tzu agi gari mubang aser jila aika mulushi aser jana agi asüng.

Taoba hopta nungi tenzüka anogo ishika tzünglu kanga sashia aruba ajanga region nung tesem aika nung ayong nungi tzu nungteta adoka liasü.

“Europe nenok den nokdaka lir ta ashitsü atema ni yangi lir,” ta lai Poland linük kübok Wroclaw yimti nung iba tzümetsüng agi kongshia aliba linüktem nungi lenir den külemi nokdaker lai ashi.

“Ibai nungdakba mapangji lir... alimar lendong asoshi teyari nungdaker, aser iba tayongzüka koktettsü asoshi asenok ajak külemi

nokdaksüla.”

EU cohesion funds nungi sen billion 10 euros (\$11.16 billion) lemzütsütsü aser iba amala sen ya züngsem linüktemi yarisemtsü atema talenba kar alir, koba tekeraba nung agütsütsü mechi talenba ya agientsü, ta von der Leyen-i ashi.

Alimar lendong ajangshia aliba züngsem linüktsü yariba nung amshiba EU indang Solidarity Fund amshia ki o jen yanglushitsü, ta lai ashi.

Poland Ato Kilonser Donald Tusk-i private broadcaster Polsat News dang Poland sen 5 billion euros angutsü akok ta ashi.

“Tang asenoki nungdakbaji kera ki o jen yanglushitsüba ya lir, kong sen jenti indoktsü, aser ibaji national budgets nungi dang amshitsübo tasak alitsü,” ta Czech Ato Kilonser Petr Fiala-i ashi aser teyari atema von der Leyen-i sentong tajung benokba atema pelar ta shisem.

Tzümetsüng agi teraksa agütsüba nung yaritsü atema sorkari 2024 budget amendment nung sen 30 billion crowns (\$1.3 billion), GDP shilem 0.38 shi agütsütsü aser 2025 budget nung sen 10 billion crowns lemzütsütsü, ta Czech Finance Minister Zbynek Stanjura-i Brestobarnü shia liasü.

Czech Interior Minister Vit Rakusan-i power supply timba Hokulbarnü tashinung yanglutetsü ta shiogo.

Iba linük nung tan hopta tatemi regional elections agitsü aser election shidak agitettsü mechi mobile signal malidak satellite connections amenoka lir ta ketdangsür temi shia lir.

Hungary nunga jila balala nung Danube ayong nung tzu tali ayimba azüoktsü meranger aser Ato Kilonser Viktor Orban-i Budapest nung tzu ya Deobar anungdang mesüra nikongdang tashinung timba akumtsü imlar ta ashi saka 2013 küm anguba dang nungibo tajemba asütsü ta shisem.

**Al-Qaeda den sendaktepa aliba teloki Mali nung nisung 70 shi tepset**

Bamako, Rongjui/Sept. 20 (Agencies): Al-Qaeda den sendaktepa aliba teloki Mali yimtiba Bamako nung hopta tetenzüklen amakdang nisung 70 dak tema süogo, ta diplomatic aser security sources ajanga ashir.

Jama’at Nusrat al-Islam wa al-Muslimeen (JNIM) telok nungi züngsem temi elite police training academy aser anasa aliba airport Mongulbarnü amak, aser iba yongji iba West African linük nung nüburtem aoksatep aser ain adoker.

Iba lendong nung nisung 77 tepset aser 255 yiru, ta security osang ka ajanga ashi.

Tejangja ketdangsür osang kati iba lendong nung asür nisung 100 shi liasü aser nisung 81 jangjatetogo ta ashi.

Bamako nung amenoka aliba densema region nung aliba diplomats anati asür ya 70 shi asütsü ta ashi.

Iba region nung aliba diplomat kati yiruba aser asü-amaba ya noklang tema aser mozüki agi mesemi yirur alirtem anepalutar ta ashi.

Iba linük nungya küm ter jakdang nungi sorkar anema nok-nü amer nokdakba telok balala den rara arur. Iba azüdokshi ya Sahel region nung kidanger linüktem nunga kongshia nisung meyirijang aika takum samaogo aser million aika pei ki yutsür tesem balala nung jenoka alir.

Mitkar temi tashiyim amshia 2021 küm sorkar atsüngdokba sülen parnoki tensa azüokogo ta sangdongba ama masü iba

azüdokshi ya ajurur, koba France sepaitem ainshir security atema Russia dang teyari meshia lir.

Mali indang mitkar yimsüsür temia takoksa ajuruba indang shiogo. JNIM-i sangdong ka nung Russian mercenary group Wagner züngsemtem densema par anema nokdaker ter dak tema tepset aser noklang aika yiru ta ashi.

Parnoki social media nung video tem prokshiba nung par züngsem temi presidential hangar indang windows nung tapi agi injang khaloktsüba aser tayimtsü kar raksatsüba nguogo.

Raksatsüba tayimtsütem rongnung World Food Programme (WFP) ajanga nüburtem yariba nung amshiba

tayimtsü ka dena lir ta South African aviation company National Airways Corp ajanga ashi.

Iba tayimtsü ya Mali meta talanglen aid workers tem senzüba aser emergency humanitarian aid agütsüba nung amshia liasü, ta WFP odongtar Djaounsede Madjiangar-i ashi.

“Onoki Mali nung tayimtsü ka ya kisüng mamshir, saka iba yagi humanitarian telangzüba ajema akumer,” ta pai ashi.

nited Nations Secretary-General Antonio Guterres, kidanger Senegal, African Union Commission Chairman Moussa Faki Mahamat aser France aser United Kingdom indang embassy tem densema linük balalai iba lendong ya aitsü.

STATE OSANG :

Tapak 2 nungi...

Nagaland nung Symbios Green Energy-i anü...

Iba kasa sentong nung Waaree Energies Limited nungi aruba Wb. Bidyut Mahanta-i anü tashi atsüzüka amshiba ajanga Nagaland nung temelenshi tajung bener arutettsüsa inyaktsüba lenmang aser sentongtem lemsatep.

Iba sentongnungsa Symbios Green Energy kibur Wb. Imkongsanen Jamir-i Waaree Energies Limited den külem ser inyaktsüba sentong indang lemsatep dang, tang ya Nagaland nung electric light tashi agi meperiba ajanga timtem tulu lir, kechiyong tang Nagaland nung light tashi ya 210 MW nüngdaker saka takong mapangbo 7MW dang agütsüteter, anungji iba timtemji kokteta Symbios Green Energy

ajanga Waaree Energies Ltd purtem teyari agia inyaktettsü ta metetdaksü. Iba sentong ajanga kidang, office, alu aser mapa inyaddak ajak nung anü nungi atsüzükba light tashi agütsütettsü ta paisa ashi. Iba sentong aser mapa meshiteta Chumoukedima Ao Baptist Arogo nung sannüker, Dr.Imtisangbai sarasadem.

Fazl Ali College nung Commerce Stream ki lapokogo

2015 küm Commerce building asü tenzükba 2021 küm tembanger tanü lapoker saka PM-USHA sentong kübok New Academic Building yabo mapang tatsüka tsüngda nung renemtettsüsa inyaktsü, iba den külemi ano Rashtriya Uchchar Shiksha Abhiyan (RUSA) building koba Centrally Sponsored Scheme kübok südagi ibaji taruba küm tzüngluruwa matongdangsa tembangtsü ta Minister, Higher Education-isa metetdakja ashi.

Minister, Higher Education, Temjen Imna Along-isa Higher Department-i Nagaland nung Higher Education riju ajak nung terenlok lia tarutsü lenirtem anitetba nung shilem tajung agirtem südaksüner ta ashi.

Paisa ano Mokokchung district kübok Mangkolemba aser Tuli nung Model College kakabosa alitsü asoshi

inyaktsü nükjidong lir ta metetdakja ashi.

Minister Temjen Imna Along-isa Naga lima tia indang süoka jembidang Naga nungertemi lenmang tajung maliba, mozüki tajung makaba, shisaliokdak riju tangar menepa maliba indang jashia jembir, iba den külemi Naga lima asoshi teimla maka ta jembir, saka Naga lima ya tajungba melenshitsü, Naga nübur melenshitsü aser Naga nungertemoatsü nung alitsü, kechiaser Tsüngrem ajak rongnung Naga nungertemoatsü nung alia meimerta ashi.

Sentongnungsa Ao Senden tir Wb.Marsanen Imsong-i jembidang Fazl Ali College nung Stream asem Arts, Science aser Commerce ta lopktetbaji ajanga Naga lima nung stream asem aliba college tanabuba kümogo ta pelaba olen ka ashi.

Ao senden tir-isa tanü Fazl

Ali College nung Commerce Stream lapoktetogo, aji asünung taruba academic session nungibo Commerce Class-ji tenzükba aotsü asoshi Higher Education department-i temulung agüja inyaddaksüner ta ashi.

Kasa sentong nung Fazl Ali College Principal Dr.I.Wati Imchen, Joint Secretary H&TE & Ex-Officio Director Higher Education Smt.V.Lonitoly Sema, tenatia jembiba den EE(H) Education Division Er.Hokato-i Technical Report agütsü aser Asso. Prof. & HOD, Dept. of Zoology, Smt. Imlinungla ketdangsuba nung iba sentong agi aser Commerce Building aser PM-USHA sentong kübok New Academic Building ka asütsü asoshi temeshiteta sarasadem Mokokchung Town Baptist Arogo Pastor Rev. Ponen Longchar-i agia liasü.

iRAD/e-DAR training ka Kohima nung tenzükogo

Transport Commissioner, Elias T.Lotha-i iba training ayongzükba nükjidong lemsatepba mapang, state nung road safety teblemetsü asoshi lenmang bushitsü nüngdakba ajiteta Nagaland Road Safety Policy ya 2017 küm yanglu, ta ashi.

Iba policy nükjidong ya lenmang nung lendong ajuruba nungi kumzükba alitsü asoshi yimya sayua, angazüka amshitsü asoshi lir aser iba ya mission mode nung amshitsü tongtipang kumogo, ta pai ashi. Lenmang ya ajak asoshi yanglu aser ajaki kumdanga amshitsüla, ta Elias T. Lotha-i

ashi. iRAD aser e-DAR indang tongmelang agi rateta jembidang, Stakeholders/ Department ajunga nem iRAD/ e-DAR indang tajungba nung angatetdaksütsü nükjidong nung training ya ayongzük, ta Chief GM, NICS New Delhi, Jitender Kumar-i ashi.

iRAD/e-DAR ya Ministry of Road Transport & Highway ajanga yangluba lir aser ibai 'management claim processing' osang agiteptsü aser lenmang nung lendong atalokba asadanga linük nung road safety tashi itshitsü atema lir, ta ashi.

Iba sentong nung Additional

Transport Commissioner, Keneingunuo Clara ajanga pela agizükba o jembi aser SIO NIC Lanusungkum Aier-i Nagaland nung iRAD & eDAR indang jenjang asadanga lemsatepa liasü.

Nikongdang session nung shisalen sayur Program Manager, iRAD/ eDAR NICS New Delhi, Pawan Gupta-i Data visualization, Data analytics India Vs Nagaland July 2024, Road safety initiatives, suggestion for improvement, Overview of cashless treatment scheme amala onük nung ajemdaker jembiba liasü.

Yimchalu nung 3rd Nagaland Photography...

Sentong nung pela agizükba o PCD tir Letminthang Kipgen-i jembi, Yimchalu Chairman, Village Council ajanga salem o jembi aser Pastor, Sangratsu Baptist Church ajanga sentong tenzükba sarasadema liasü.

Iba benjongmung nung shilem ka ama Angler Association Mokokchung ajanga iba tesem nung angling competition ka ayongzükba

liasü. Tetoktepba nung takok angur nem sempet agütsüba sentong Advisor, Fishery & Aquatic Resources, A. Pangjung Jamir-i moatsü.

Iba mapang Advisor Pangjung Jamir-i angling ya südoksünemba saisapong ka ama kumtar aser tetsür tebur ajaki mela-mela inyakteter, ta ashi. Natural water resources aliba ajanga state nung ango

aputsü lenmang peria lir, anungji iba rongsen wazüka ayutsü ajak mapa lir, ta pai ashi.

Iba tesem nung Photo Exhibition gallery ya W.Nginyeih Konyak, Chairperson, Nagaland State Commission for Women, Government of Nagaland ajanga lapokja liasü.

Laia photography ya o mejembi nisung ajaki angatetba oshi lir ta ashi.

NSFMM Trophy: JYO, Sechü Zubza FC & F4C-i takok angu

Kohima, Rongjui/Sept. 20 (TYO): Angami Students' Union ajanga Indira Gandhi Stadium, Kohima nung tang ayongzükba asayaba 24th NSF Martyrs' Memorial Trophy nung Brehostibarnü Jakhama Youth Organisation (JYO), Sechü Zubza Football Club aser F4C Academy takok ngua round tasembubai yiogo.

Mezüng asaya nung Jakhama Youth Organization ajanga Youngsters FC madak 6-0 agi takok angu. Iba asaya nung Jakhama Youth Organization asoshi minute 8 buba nung Kesuhoto Zao-i mezüng goal agütsü aser iba sülen minute 24 buba nung Vikuto Tase-i par telok asoshi tanabuba goal agüja liasü.

Anisüngzükba sülen Keneileho Khatso-i minute 43 buba aser minute 48 buba nung goal ka-ka agütsü aser Kulse Zhotso-i minute 46 buba aser 54 buba nung goal ka-ka agüja liasü.

Iba asaya nung Keneileho Khasto nem Man of the Match sempet agüja liasü.

Tanabuba asaya nung Sechü Zubza FC-i Magdaline Coaching Centre madak 4-2 agi

akok. Iba asaya nung Rhitso Mero-i Sechü Zubza FC aoshi goal pezüprong agüja Man of the Match sempet agütsü aser Magdaline CC asoshi Nasal Pucho-i asaya tenzük minute 5 buba nung goal ka agütsü aser goal ka ya Dupisa Pucho-i minute 7 buba nung agüja liasü.

Kasa anogo asaya tassenbuba nung F4C Academy-i Kigwema Students' Union madak ayong-ayonga takok angu. Iba asaya nung F4C Academy asoshi Kishore-i first half injury time nung goal ka agütsü aser Thothong-i minute 36 buba aser 59 buba nung goal ka-ka agüja liasü. Maneni Lungin-i minute 40 buba nung par telok asoshi goal pezü buba agüja liasü.

Iba asaya nung Player of the Match sempet ya F4C Academy nungi Paolenmang Jr. nem agüja liasü.

September 21 nü asaya yamai alitsü:

- 1. Red Scars vs Tsiepfu Tsiepfhe @ 9:30am
2. Seithekema FC vs UEFC @ 11:30am
3. Amateur vs New Market FC @ 1:30PM

Nagaland Wushu fighter tem National Championship atema ogo



Nagaland nungi 33rd Senior National Wushu Championship nung tokteptsü asoshi Dehradun-i maodang Guwahati nung tangokba noksa nung angur.

Dimapur, Rongjui/Sept. 20 (TYO): Nagaland nungi Wushu fighter pongu den team ketdangsür asem tashi Dehradun, Uttarakhad nung 33rd Senior National Wushu Championship nung toktetsü asoshi Hokulbarnü Dimapur nungi ogo.

Iba sentong ya September 21-26, 2024 anogotem Maharana Pratap Stadium, Raipur nung alitsü, ta Nagaland Wushu Association sangdong ka ajanga ashi.

Nagaland Wushu Association tenüng nung Neizouvotuo Khusoh ya team coach, R.K. Shanti Kumar Singh ya assistant coach aser Azhove Resu ya team manager ama adener.

Iba championship nung asayarterm Vipu Zhimomi (52kg

category), Mankho T. Konyak (56kg category), Nupa Kiho (60kg category), Lichonthung Odyuo (65kg category) aser Yoto Chizo (70kg category) alitsü.

Item asayarterm yagi national championship nung temaba jenjang ti nung tembangtetra parnok state tenüng nung National Games nung shilem agitsü maongka angutsü.

Terenemshiba camp kanga junga agiogo aser yiruba melira medal angutsü imlar, ta team coach Neizouvotuo Khusoh-i ashi.

Nagaland Wushu Association tir aser Advisor, CAWD and Taxes, Küdecho Khamo-ia Nagaland tenüng nung national championship nung shilem agirtem den yaritepba liasü.

BILEMDANGANG

"Menürem ji temeim tenzükdak."